



## **KENYATAAN MEDIA**

**EXCO PEMBANGUNAN WANITA DAN KEBAJIKAN MASYARAKAT  
NEGERI SELANGOR**

### **KERAJAAN NEGERI MEMBINCANGKAN ANALISIS DAN STRATEGI MITIGASI IMPAK KRISIS ASIA BARAT TERHADAP USAHAWAN & PEMBERDAYAAN EKONOMI WANITA**

1. Kerajaan Negeri Selangor melalui Wanita Berdaya Selangor (WBS) telah menganjurkan Perbincangan Meja Bulat 2 (Round Table Discussion – RTD) bertemakan “Krisis Asia Barat – Impak Terhadap Usahawan & Pemberdayaan Ekonomi Wanita” bagi membincangkan kesan semasa serta strategi mitigasi terhadap impak krisis Asia Barat ke atas usahawan dan pemberdayaan ekonomi wanita.
2. RTD ini menjadi platform strategik untuk meneliti cabaran semasa yang dihadapi oleh ekosistem keusahawanan, termasuk peningkatan kos operasi, gangguan rantai bekalan global serta tekanan terhadap kelangsungan perusahaan mikro, kecil dan sederhana (PMKS) yang diketuai oleh wanita.
3. Perbincangan turut memberi tumpuan kepada cabaran struktur yang dihadapi usahawan wanita, termasuk akses kepada pembiayaan pertumbuhan, pasaran bernilai tinggi, jurang digital serta keupayaan meningkatkan skala perniagaan. Dalam masa yang sama, penekanan diberikan kepada keperluan memperkukuh kerjasama rentas agensi dalam aspek pembiayaan, latihan, pembangunan kapasiti, pemerksaan digital serta inovasi perniagaan bagi memastikan daya tahan ekonomi yang lebih mampan.
4. Sesi ini menghimpunkan kira-kira 30 peserta yang terdiri daripada wakil agensi Kerajaan Persekutuan dan Negeri termasuk Kementerian Pembangunan Usahawan dan Koperasi (KUSKOP), Perbadanan Ekonomi Digital Malaysia (MDEC), SME Corporation Malaysia (SME Corp.), TEKUN Nasional, Institut

Keusahawanan Negara (INSKEN), serta agensi negeri seperti *Selangor Information Technology & Digital Economy Corporation* (SIDEK) dan Yayasan Hijrah Selangor (YHS). Turut serta ialah agensi pembiayaan, pertubuhan bukan kerajaan (NGO), badan antarabangsa, masyarakat sivil serta usahawan wanita dan belia.

5. Cadangan dan input yang dikemukakan dalam sesi ini akan dijadikan rujukan oleh Kerajaan Negeri Selangor dalam merangka pendekatan dasar yang komprehensif, responsif gender dan berimpak tinggi, khususnya dalam memperkukuh ekosistem keusahawanan wanita dan belia.
6. Penganjuran sesi ini adalah selaras dengan Dasar dan Pelan Tindakan Wanita Selangor 2024–2026, khususnya di bawah Matlamat 2 iaitu meningkatkan status sosio-ekonomi dan autonomi wanita yang terpinggir.
7. Kerajaan Negeri Selangor terus komited untuk memperkasa golongan wanita melalui pendekatan menyeluruh dan kerjasama semua pihak, selaras dengan aspirasi membina ekonomi yang inklusif, berdaya tahan dan mampan.

**YB PUAN ANFAAL BINTI SAARI**

29 April 2026